

四庫全書

集部

欽定四庫全書

宋元詩會卷七十七

兵部主事陳焯編

揭傒斯

字曼碩龍興富州人父來成宋鄉貢進士傒斯幼貧讀書尤刻苦晝夜不懈繇是貫通百氏大憲間游湘漢程鉅夫盧摯先後為湖南憲長咸器重之鉅夫因妻以從妹延祐間程盧列薦於朝特授翰林國史院編修官時平章李孟監修國史讀其所撰功臣列傳歎曰是方可名史筆若他人直謄吏牘耳陞應奉遷國子助教再入翰林天厯初開奎章閣首擢授經郎文宗時幸閣中奏對稱旨恒呼

字而不名每中書奏用儒臣必問曰其材視揭曼
碩何如與修經世大典授藝文監丞參簡較書籍
事元統初遷翰林待制集賢學士代祠北嶽還擢
奎章閣供奉學士改翰林直學士陞侍講學士同
知經筵至正三年年七十請老不許詔修遼金宋
三史以俟斯為總裁四年遼史成未幾得寒疾七
日卒追封豫章
郡公謚文安

遊麻姑山雲關

君子荷初服恩至若無榮穆穆芳雨散悠悠蒼山行危
闌擁霧黑飛桁緣雲青苔鮮滑如積松杉杳冥冥時逢
負芝翁忽聞流水聲舉足向益高矯然欲遐征徒隸各

忘倦矧彼高人情

黃鶴山聽雨得清字

玄局息深構虛館含餘清
瀟洒松上來瑟縮花間鳴
遙兼夜析警細與寒更并
懷親感離別撫物愧生成
土思浩方殷春聲耿逾明
幸及朋知好達此旦暮情
北展非窮轅南山夢歸耕
何言託毫素聊與歎平生

湖南憲使盧學士移病歸潁舟次武昌辱問不肖姓名奉寄

我本耕牧豎結廬章江溪微生屬休明世尚猶典禮驚
飈卷飛轍寥落從此始三年江漢春萬事隨逝水既昧
理生術復慚遊方旨豈無青山歸亦有桑與梓何為苦
留滯眷眷存君子君子諒不然東臯畢耘耔

麻姑壇

嵯峨仙都觀遙望丹霞天後有千歲松前有百頃田風
日夏颯沓煙雲晝蔥芊羣彥一時集安知非列仙持觴
起相酬罷琴接高言天道信悠邈人情何拘攣靈君不

可致落景詎少延仰雖慚冥冥俯實憂元元主人顧坐
客此中可忘年

正月十二日尋廬學士船至漢口留詩為別

晴江澹微瀾曳雲在層巘參差連舫出散漫羣鷗遠始
知遵漢廣遙睇高旆卷懷賢每忘賤臨流亦忘蹇蒼茫
景將入杳渺春猶淺新知遽相違餘悰何由展

重餞李九時毅賦得南樓月

娟娟臨古戍晃晃辭煙樹寒通雲夢深白映蒼祠暮胡

牀看逾近楚酒愁難駐雁背欲成霜林梢初泣露故人
明夜泊相望定何處且照東海歸行送歸舟去

過江州

遙瞻九江樹已踏西江土落日照庾樓驚風滿湓浦寒
鷗迎櫂起遠岫依城吐悵然感羈遊澹爾成賓主白頭
釣魚叟赤足浣紗女未識居者歡安知行者苦

春日雜言

幕屋楊柳枝蒙茸春草齊天天誰家婦采桑臨路岐零

露沾其裳蛛絲卷其衣樹高身苦弱蠶饑行復遲辛苦
事姑嫜宿昔減容輝見者皆歎息此心獨誰知良人日
暮至嗔問汝何為

三月三日奉陪憲使程公遊麻源第三谷宴藏書

山房白雪樓

明公富暇豫勝日懷登臨蹠躡驄馬行窈窕幽人心縣
崖響晴雨奔流濯春陰雲門轉絕壑畫橋貫長林拂石
慨往運聞鐘知古音耆松有百圍突嶂踰萬尋小憩釣

魚臺聿瞻華子岑
捫蘿入縹緲側徑臨蕭森
上有百尺樓下有孤猿吟
初筵俯層巔微風蕩危襟
笑語信忘我觥籌浩難任
豈不念永留惘然歸思深

遊禪林寺喜得昌上人

靈臯獨懷往危軒泊閒寂
偶與塵事違況值禪林客
深苔上脩玉輕霏澹凝碧
驀見飛鳥還靜聞寒溜滴
空明會真賞漂流得良覲
常恐心跡乖無由展平昔

淵明歸興圖

家貧無酒飲聊欲試絃歌去家百餘里邈若異山河江
上日多風浩浩水增波門前五柳樹繁陰空婆娑秫田
已收成歸計當如何

雜詩

青青孤生松高出浮雲中下有嘉樹林上有萬里風俯
視原上草秀色何丰茸自顧豈不高獨立難為容常恐
本根蠹委此蒿與蓬

送袁先輩之盱江

賤貧戀知己親愛畏離別雨罷江色黃扁舟此時發煙
綿綠蕪遠杳渺孤禽沒行雲滿西原麻姑在天末

送華尊師以天壽節奉詔祀武當

靈時嚴漢祠神峰標楚甸羽人丹丘伯承詔馳嘉薦華
渚曜玉虹條風舞玄燕長淮雨中瀉喬嶽雲間獻涉甸
厯峻址梯空答弘願授簡香始升揭虔帝如眷天清翼
軫動地肅玄武見飛響迴相聞奇祥靜逾綯是有真
侶早接諸方援胼胝負畚鍤鑿翠蓄雷電金芝產齋房

璫雲冠巖殿祈禱無歲年會節方紛衍既協時若降又
樂明祀徧聖厯齊堪興豐澤周寓縣還歸報天子獨往
奚所羨

春暮閒居寄城西程漢翁十五韻

迢迢層城阿嵯嵯鳳凰山下有隱淪士能為河漢言兩
日一寓音五日一承顏每談經濟事恒及離亂間言詞
多慷慨文字少凋殘不歎東逝川但憶南山田寧與無
心遊不受衆目憐褰衣必峻嶸散步亦名園卷舒信在

襟蕭寂固所安經春窘疾痲撫時增懦孱羣書亂藥裏
高臥掩荆闕塞予屬久要朝詣常暮還醜劣愧高情焉
知君所觀日出衆鳥語蒼岑滿樓端申章寫深詣謗薄
何由宣

去婦詞

江東有一士子留都下三年適娶一貴人女為妻久
乃知其已有妻子矣一夕逃去因託去婦為之詩非
徒欲傳其事抑以示風戒云爾

輕合鮮義終苟容希禮遇遠結萬里婚多為才名誤始
與君結好不知君有婦有女嫁他人俱懷託遲暮青青
牆下草生死牆下路娟娟道傍花零落無處所女子失
其身何以保貞素既乖百年意百年誰能度對鏡空悲
惜中心良難訴浮萍難為託一木無兩附棄舊屬新歡
新歡漸成故寧當中路拆莫被他人去寧老阿母傍不
受他人妬騰身出房闥兩絕無復顧豈願嫁他人甘心
西山樹

贈王郎

王郎楚狂士意氣飛秋霜讀書盡萬卷下筆數千行富
貴視浮雲況肯矜文章十五恥里居掉臂辭故鄉夜宿
東海月朝買西州航瞑目王公前結客少年場一飲或
一石一醉或一觴寧揖屠狗人不與俗士當千金不易
笑歲暮單衣裳阮籍在窮途英聲連四方鸞鵠有時鍛
反愧燕雀翔世無劇孟交不及青樓倡燕趙如花人翠
袂黃金璫不識豪俊士空媚癡與狂王郎遠過我坐我

枯藜牀終夕無酒飯撫髀歌慨慷平明別我去極目空
茫茫

登祝融峰贈星上人

洞庭南桂嶺北衡山連延瀟湘黑中有祝融如髻鬟嵯峨
七十二峰間祝融不自知千山萬山如迴環面面芙蓉粧
儼如天仙朝紫皇千官百辟遙相望半夜每瞻東海日
六月常飛滿樹霜龍拏鳳攬熊虎躑雲生霧滅何時極
我來正值太平時況有山僧似疇昔憑高一覽四海空

草間培塿安足雄盤盤羅漢臺翕翕炎帝宮復恐九天
上視我如井中朔風日夜相騰蹙谷老崖堅松柏禿古
來鐵瓦盡飄揚山上至今猶板屋山僧勸我歌我歌徒
自傷天下五嶽嵩中央此山與我俱南疆我今三十始
一見北望中原天更長

送黃五舅得武陵較官還辰州寓居省侍

寧上山頭種禾黍莫向他鄉作羈旅山田得雨尚有年
他鄉憔悴何人憐一身千里家何在全家更在沅湘外

獨樹雞鳴楓葉飛荒村雁落蘆花碎親在窮途望子還
子在長途衣復單居無寸田出無僕明年作官當食祿
望葛市有懷故人盧子儀

順流無風江更急歲暮歸人浩難繫所思只隔江上村
亂樹參差不容入憶昨扁舟滯雲夢觸熱千里能相送
我來悵望竟空還一樽知是何年共樊山蒼蒼赤壁暮
武昌對岬黃州路連聲大笑櫓如飛回頭獨送孤雲去

題邢先輩西壁山水圖

邢家蒼蒼西屋壁萬壑千巘動寒色大江忽轉天地迴
浮雲孤飛日月白參差樓觀照林紅松檜淒迷起朔風
崑崙蓬萊不可到赤城白帝遙相通賤子平生尚奇偉
南極衡湘北幽冀復從大駕上灤京始投邢君多意氣
君昔扈從戎馬間少壯不知行路難月明飲馬長城窟
雪深射虎祁連山萬里歸來太平日坐我江山百憂失
平明萬騎出天門又駕官車就行役

研山詩

山石出靈壁其大不盈尺高半之中隔絕澗前後五十五峰東南有飛磴橫出方平可二寸許鑿以為硯號曰研山在唐已有名後歸於李後主主亡歸于宋米芾元章刻其下述所由來甚詳宋之季歸于天台戴運使覺民後又歸其族人宰相賈似道求之弗與攜持兵亂間寢處與俱乃獲全大都太乙崇福宮張真人本戴氏子今年春貽書得之請予賦詩其詞曰何年靈壁一拳石五十五峰不盈尺峰峰相向如削鐵

祝融紫蓋列前後東南一泓尤可愛白晝玄雲生靈霽
在唐已著羣玉賦入宋更受元章拜天台瀕洞雲海連
戴氏藏之餘百年護持不浣權貴手離亂獨與身俱全
帝傍真人乘紫霞尺書招之若還家陰崖洞壑寒飴飴
宛轉細路通褒斜崑崙蓬萊與方壺坐臥相對神僊居
硬黃從寫黃庭帖汗青或抄鴻寶書秦淮咽咽金陵道
此物幸不隨秋草願君谷神長不老淨几明牕永相保

題百丈輝長老所藏李仲賓之孫歲寒圖

豫章西南百丈峰下有
大竹多長松巢雲貯
霧翻飛淙緣崖繞澗
迷春冬馬駒踏人有
龍象東陽老輝在百
丈西江瀉入半甌茶
臥竹眠松九天上薊
丘丈人子又孫筆入
造化春無痕清風瀟
瀟上界聞夜闌疎鐘
啼斷猿

白楊河看月

白楊河上看明月昔
人曾照今人別茅屋
數家河上村化作三
山白銀闕波平風靜
權歌來萬頃沖融鏡
面開今夜江南憶遊
子空瞻雲漢上昭回
茫茫萬里燕齊路

北斗縱橫泰階曙
黃河東逝月西流
明日南風過洪去
大信晚泊呈舟中諸公

千家楊柳江當門
東梁西梁兩岸蹲
連檣大艦集日昏
擬金伐鼓海上聞
小江更出采石後
前人立功後人守
大信花采石酒陌上相逢莫回首

李宮人琵琶引

鄆縣亢主簿言有李宮人者善琵琶至元十九年以
良家子入宮得幸比之王昭君至大中入事興聖宮

緣有足疾乃得賜歸侍母給內俸如故因亢且乞詩
於予為作李宮人琵琶引其詞曰

茫茫青塚春風裏歲歲寒風吹不起傳得琵琶馬上聲
古今只有王與李李氏昔在至元中少小辭家來入宮
一見世皇稱藝絕珠歌翠舞忽如空君王豈為紅顏惜
自是衆人彈不得玉觴未舉樂未停一曲便覺千金直
廣寒殿裏月流輝太液池頭花發時舊曲未終新解譜
新聲萬變總相宜三十六年如一日長得君王賜顏色

形容漸改病相尋獨抱琵琶空歎息興聖宮中愛更深
承恩始得遂歸心時時尚被宮中召彊理琵琶絃上音
琵琶調終聲轉澀堂上慈親還佇立回看舊賜滿牀頭
落花飛絮春風急

祖生詩

浦城孝子身姓祖自憐性命如糞土生才五歲遭亂離
有母更被官軍擄零丁二十八春秋母縱得生何處求
天地茫茫明月恨江山漠漠白雲愁忽得母書驚母在

看書未盡淚先流書云流落河南縣河南踴遍無由見
唐州境上忽相逢白髮蕭蕭霜滿面誰知喜極情轉悲
傍人更問初別時千生萬死到今日始為母子東南歸
東南迢遞關山路入門猶記堦前樹居人傳說盡相看
雞黍提攜竟朝暮祖生母子真可憐少壯離別老大還
同時鄉井被兵者幾人骨肉能生全願生母子長壽考
四海昇平永相保

居庸行

昔望居庸南今出居庸北巖巒爭吞吐風水清且激
逶迤數千里曲折殊未息關門兩向當天開馬如流水車
如雷荒雞一鳴關吏起列宿慘淡雲徘徊山盤盤石圍
圉山如龍石如虎龍怒欲騰虎欲舞太行劒勢猶如許
昔不容單車今馬列十伍聖人有道關門開關門開千
萬古

長風沙夜泊

長風沙風沙不斷行人嗟行人嗟奈君何南風正高北

風起大船初灣小船喜移船更近大船頭不獨風沙夜
可憂但祝行人好心事長江何處是安流茅舍參差數
株柳時平尚置官軍守青裙老嫗詫鮮魚白髮殘兵賣
私酒

夏五月武昌舟中觸目

兩髯背立鳴雙櫓短蓑開合滄江雨青山如龍入雲去
白髮何人並沙語船頭放歌船尾和蓬上雨鳴篷下坐
推篷不省是何鄉但見雙雙白鷗過

題明皇出遊圖應制

明皇八駿爭馳道還是開元是天寶長安花發萬年枝
不識年華醉中老奎章閣下文書靜衮衣高拱唐虞聖
莫言此畫徒爾為千載君王作金鏡

黃尊師高軒觀鵞因留宿

開軒南嶽下世事未曾聞落葉常疑雨方池半是雲偶
尋騎鶴侶來此看鵞羣一夜潺湲裏秋光得細分

飲張氏別墅

楚國多才俊張家好弟兄出門湖水碧留客野堂清微
雨鳴疎竹寒烟覆古城園人隔畦語歲暮此中行

以事暫如武昌發臨川

江轉欲無路山迴忽似圍客程秋共遠物色晚多違稍
稍沙鷗集怱怱野樹稀武昌今夜夢定遇故人非

過南康夜泊聞廬阜鐘聲

廬山三百寺何處叩層雲宿鳥月中起歸人湖上聞入
空應更迴近瀑正難分遙想諸僧定香爐上夕熏

喜趙順昌官滿來歸

七載卑栖邑孤標浩蕩中去時惟自信歸日幾人同平
世難為澤高人不計功黃河萬里道洗楫待春風

寄題永豐劉氏暖翠亭二首

孤亭萬竹中危坐自生風近與山光合遙連野氣通鳥
啼深不見泉響靜偏聰東帛休相污先生道未窮
雞山俯鷺溪亭子畫堂西流水茭蒲合陽林竹樹齊耕
桑烟外集賓客雨中攜萬事俱塵土詩成手自題

送陳教授赴郴州

君向郴州去迢迢千里餘年侵別後鬢客問講殘書斷
雁秋風外啼猿落日初興文今日意慎莫愛吾廬

出三洪峽

積水羣山裏行舟亂石間地偏疑隔世峽怒欲藏關獨
鳥啼深樹斜陽下急灘千憂逢一快未覺此生孱

山莊晚立有懷舍姪沆督獲臨川

藪藪黃桑葉蒼蒼白竹峰居人爭野碓歸客背村鐘路

暗緣溪濕山寒著露濃阿戎收稻米辛苦缺相從

望嶽

岱宗齊魯間萬古統羣山日向夜中見雲從海外還
靈深屏翰空翠滿河關盡日臨清霽巖巖不可攀

寄題太子文學張希孟凝雲石

聞說張文學家藏石一拳斷痕分淺黛古色亂輕煙
潤想猶懷玉幽疑欲迸泉應從少海得宿昔滿桑田

石鼓

孔廟頽牆下周宣石鼓眠苔分敲火迹雨洗篆蝸涎野
老偷為白居易人打賣錢有形終亦盡流落謾堪憐

銅儀 宋沈存中所鑄

法像坤儀重來從汴水遷飛龍纏四極黃道界中天望
絕秋毫末循環太古前荒臺明月夜應有淚潺湲

趙道士山水圖

悄愴寒山曉淒迷野水昏長橋通古寺小艇背衡門路
盡雙松上雲生亂石根如行南嶽暮遙見祝融尊

大駕既還獨候驛傳未得和陳真人見示

供奉關山遠淹留日月長鄉書迷楚越鄰笛亂伊涼秋
水流成字晴雲去作行寸心縣帳殿應似雁隨陽

沈逸人東觀招飲山館

野館青山下晴軒積雨餘招尋蒙遠客寂寞愧閒居空
翠沾杯冷殘雲度谷虛從茲結朋好隨處問何如

參禪圖 圖寫洞賓黃龍東坡佛印

兩山從兩禪異代各談玄絕壁浮春樹空山響夜泉共

遺行住想俱斷去來緣此日開圖畫焚香亦爽然

和傅與礪

近日何多念頻年不肯還河流無故道春色是他山
几看雲凭衡門罷月關無情寒與暑偏解鑄衰顏

送秦從事巖卿赴遷安令

聲名藉藉秦著作不見郎君出宰時路入北平黃葉盡
夢回西掖白雲移罷氓舊塞猶耕種野老深村幾亂離
遙想此行前未有來時嗟晚去思遲

楚山秋晚

山人何處抱琴歸
遙想樓臺隔翠微
老樹風生舟正泊
空江日落雁初飛
豈無賦客能招隱
亦有漁翁醉息機
一幅秋光舒復卷
誰教塵土浣人衣

子陵獨釣圖

何事玄纁入里閭
羊裘整脫就安居
空令太史驚同寢
猶把狂奴視報書
一出聊為天子重
諸公莫道故人疎
朝廷自足中興士
且放桐江著老漁

石門峽

長安峽裏子規啼峭壁蒼蒼北斗低雲氣倒連山影合
石稜斜闊浪聲齊南風盡日迎歸櫂落月空江夢故棲
一室十人分數郡百年幾處候晨雞

夢黃鶴樓

黃鶴樓前鸚鵡洲夢中渾似昔時遊蒼山斜入三湘路
落日平鋪七澤流鼓角沈雄遙動地帆檣高下亂維舟
故人雖在多分散獨向南池看白鷗

送詹尊師歸廬山

香爐峰色紫生煙一入京華路杳然
雲碓秋閒春藥水雨犁春臥種芝田
書憑海鶴來時寄劔自潭蛟去後縣
忽報歸期驚倦客獨憐微祿負中年

送大名安治中守沔陽

展漑猶穿魏郡花分符忽指竟陵瓜
行瞻禹跡過三峽帶擁義文望五華
春雨蠶桑無曠土秋風魚稻滿貧家
亦知王政仁為本莫厭公田飯有沙

憶昨三首

宮草蔥茸禁樹稀
日趨廷顙對凝輝
朝迎步輦花間出
暮送回鑾柳下歸
碧殿東浮蒼巘合
金河北引玉泉肥
幾回弘慶門前路
春氣濛濛欲染衣

已已羣倫映璧奎
端陽侍燕寶慈西
線分學士親臣送
詩賜黃姑御手題
注酒含春瑤露重
承塵轉午錦雲低
日斜共出西門道
既醉猶能散馬蹄

奎章分署隔窗紗
不斷香風別殿花
留守日頒中賜果

宣徽月送上供茶諸生講罷仍番直學士詩成每自誇
五載光陰如過客九疑無處望重華

按客有問於虞伯生曰楊仲弘詩如何曰如百戰健
兒范德機詩如何曰如唐臨晉帖揭曼碩詩如何曰
如三日新婦先生詩如何笑曰集乃漢廷老吏也揭
聞之不悅故此首中聯有學士詩成每自誇之句伯
生得詩謂門人曰揭公才力竭矣因答以詩云故人
不肯宿山家夜半驅車踏月華寄語旁人休大笑詩

成端的向誰誇併題其後云今日新婦老矣

和張太一秋興二首

翩翩公子五雲中風骨雖殊意氣同道德淵源行地遠
神明臺觀與天通欲隨穆滿賓王母更擬軒轅相大鴻
南國正秋憂旱暵誰驅列缺起豐隆

蓬萊金闕赤回闌龍虎神君禹步寬朝暉日華當食穀
夜迎天仗識鳴鑾露飛仙掌金莖凍月滿玄都玉佩寒
遙想西齋清似水吟詩聽到漏聲殘

送李掾自北回歸省長沙因簡趙宣慰張徵士呂

宗二判官

萬里風沙斷三湘日夜流名成親白首歲暮客扁舟黃
鵠延歸思丹楓替別愁眼穿迴處雁心靜狎餘鷗細雨
黃陵廟殘陽杜若洲漸深桑梓敬翻畏友朋留送遠慚
羈旅臨分憶舊遊鐘聲衡岳曙帆影洞庭秋風壤通蠻
徼煙霞拂帝丘交歌明月市傾旆壓雲樓訪菊逢徵士
行瓜識故侯為言憔悴客敝盡黑貂裘

曉出順城門有懷何太虛

步出城南門悵望江南路前日風雨中故人從此去

和歐陽南陽月夜思

月出照中園鄰家猶未眠不嫌風露冷看到樹陰圓

題鴈圖

寒向江南暖饑向江南飽物物是江南不道江南好

何失

燕人世以織紉穀為業與張進忠製筆齊名失獨
工詩為士夫所敬重揭傒斯贈詩云心事巢由上

文章陶
阮間

感興

渥洼騏驎兒自有絕塵足錦帳過都門飛采射衆目歎
彼轅下姿亦非駑駘物世乏伯樂儔誰識千金骨所以
荷蓑士煙水自淪沒

對酒

古人不我俟不共此酒醇此酒復易盡不能俟後人並
世有不察異代若為親茫茫宇宙間此抱難具陳惟應

空中月分留大江濱

莫吟

獨老朝朝出或醉莫未歸高樹挂新月山妻候柴扉飲
伴更相送欲辟意難違感此鄉曲情淚下忽霑衣

書懷

野性長便雲水居城中有屋不如無慳時因記人來往
多少紅塵汗白鬚

燕都雜題

一夜春陰徹曉寒玉山無奈酒杯乾青娥知有愁多少
狼藉殘妝懶對看

雅勒呼

字玉卿伊
魯勒昆人

唐宮題葉

彩毫將恨付霜紅恨自綿綿水自東金屋有關嚴虎豹
玉書無路託鱗鴻秋期暗度驚催織春信潛通誤守宮
莫道銀河消息杳明年錦樹又西風

崔徽寫真

舞鸞妝鏡拭鉛華，毫素無聲散彩霞。
夜月影寒分桂魄，春水暈薄映桃花。
夢隨圖去憑青鳥，愁逐書來點墨鴉。
未得離魂如倩女，哀容先到君家。

洛神

鄴宮簷瓦似鴛鴦，飄蘭渚鳴鸞去國遙。
謾說君王留寶枕，不聞仙子和瓊簫。
驚鴻易沒青天月，沈鯉難憑碧海潮。
腸斷洛川東去水，野煙汀草共蕭蕭。

二喬

珊樹交如玉樹重鴛鴦難偶雪難容共思漢事隨流水
各對吳儂蹙遠峰洛賦未成梁月墮羌笳已斷塞雲濃
人間流落渾相似猶勝淒涼泣暮蛩

寄南臺御史達兼善 二首

昔年奎壁聚星圖文彩虛稱二妙俱祇有薰葭依玉樹
初無薏苡似明珠鳳凰臺上天光近烏鵲枝邊月影孤
壯志未消知已在敢煩音問慰窮途

白溝秋水帝城邊
曉發河南使者船
契濶山川將萬里
飄零歲月又三年
雲間快覩冥冥鳳
海上愁看跼跼鳶
經術匡君須我輩
莫將離恨染華顛

送蘇伯修御史之南臺

天上詞臣夔莫雙
乘驄此日莅南邦
梅花路近宜逢雪
桃葉波平好渡江
千里蒼生瞻繡斧
十州使者避旌幢
同袍知己如相問
已許閒身老北窓

汴梁懷古

花石岡前麋鹿過中原秋色動關河欲詢故國傷心事
忍聽前朝皓齒歌蔓草有風嘶石馬荆榛無月泣銅駝
人間富貴皆如夢不獨興亡感慨多

酬江夏友人見寄

四海元龍眼界空平生豪習竟誰雄早知黔首成秦贅
悔學蛾眉入漢宮曲水疎篁秋色裏小山叢桂月明中
故人歲晚能招隱便買扁舟向漢東

送趙東彝親迎江夏之官臨川

婀娜新衣錦繡重美人今夕過湖東一聲鐵笛千家月
十幅蒲帆萬里風孔雀畫屏占貴客甘棠嘉樹詠先公
墨池光動凌雲筆春滿花封賦更雄

送蒙古學教授之邛州

玉貫珠聯我國音亂山深處變巴吟蒼虬挂屋寒筇瘦
白鶴縣巢古棧深座冷一羶知宦況書來萬里見鄉心
文翁課最同文盛應譯嘉謨寄上林

二月梅

去年呵筆賦寒梅又見山家二月開不是使君留客醉
肯教仙女逐春回梨花院落為雲夢柳絮池塘作雪猜
東閣如今清興減羅浮誰與寄香來

京師上元夜

華月澄澄宿霧收萬家燈火見皇州天闔虎豹依霄漢
人海魚龍混斗牛公子錦韉鳴玉勒內家珠箔控銀鈎
道傍亦有揚雄宅寂寞芸窗冷似秋

送袁果山經歷之潮陽

潮陽贊府之官去猶是徽垣白髮郎天上故人縣夜榻
海邊候吏促春裝翠綃卷雨蕉花老火齊然雲荔子香
終日韓山對簾幙只愁簡牘破詩忙

留別凱烈彥卿學士

十年帝里共鳴珂別後悲歡事幾多汗竹有編歸太史
雨花無迹染維摩湘江夜雨生青草淮海秋風起白波
明日扁舟又南去天涯相望意如何

登越王釣龍臺

自古甌閩國富雄南琛不與職方通江流禹畫縱橫外
山入秦封蒼莽中逐鹿師還神器定屠龍人去釣臺空
海門望裏潮頭急何處繁華是故宮

段天佑

字吉甫河南人
官江浙提舉

送妓入道

歌舞當年第一流洗妝今日別青樓便從南岳夫人去
肯為蘇州刺史留琳館月明簫鳳下鎖牕花老鏡鸞收

却憐愁絕潯陽婦嫁得商人已白頭

謝宗可

金陵人為詩長於
詠物其聲調效薩

藕花風

舞罷紅衣起未休水雲香裏冷颼颼三更清逼銀塘曉
六月涼生玉井秋颭浪低翻霞影亂凌波輕漾錦香浮
莫教吹醒鴛鴦夢好送真人一葉舟

曉色

遠似煙霏近又空
非明非夜雨朦朧
一天清露洗難盡
幾樹暗雲遮不窮
斷角樓臺濃澹裏
殘燈院落有無中
蒼茫半逐雞聲散
又被朝陽染作紅

睡燕

補巢銜得落花泥
困倚東風倦翅低
金屋晝閒隨蝶化
玉堂春靜怕鶯啼
魂飛漢殿人應遠
夢入烏衣路欲迷
却被捲簾人喚醒
小橋流水夕陽西

筆陣

授策登壇拜墨卿
霜毫不用鐵為兵
戰酣已拔三都壘
奏捷還攻五字城
怒捲龍蛇雲霧泣
長驅風雨鬼神驚
攀蟾獨掃千軍退
功奪中書第一名

走馬燈

飈輪擁轉駕炎精
飛繞人間不夜城
風鬣追星低弄影
霜蹄逐電去無聲
秦軍夜潰咸陽火
吳炬宵馳赤壁兵
更憶雕鞍年少客
章臺踏碎月華明

詩瓢

雨蔓霜條老翠壺吟邊不是酒葫蘆剖開句裏玲瓏玉
著盡胸中錯落珠滿貯苦心留宇宙深藏清氣付江湖
誰家半腹能千首為問山人果在無

蓮葉舟

穩櫂紅衣汎渺茫風帆浪楫水雲鄉曉撐泰華半峰月
夜載西湖十里香藕放雪絲應作纜荷敲翠柄若為檣
不須更捧金仙足太乙真人夢正涼

無絃琴

獨繭長縑底用抽蛇紋空鎖鳳枝秋落星有色寒光斷
凍瀑無聲練影收別鶴那聞風外泣孤鸞不向月中愁
多情只有柴桑老寂寂山高水自流

紙帳

清縣四壁剡溪霜高臥梅花月半牀繭甕有天春不老
瑤臺無雪夜生香覺來虛白神光發睡去清閒好夢長
一枕總無塵土氣何妨留我白雲鄉

塵


人海深藏混沌中，非煙非霧遠空濛。
六街錦繡迷香紫，九陌笙簫踏軟紅。
微步緩隨羅襪起，清歌飛繞畫梁空。
南來一騎蛾眉笑，又送長安荔入宮。

蟠梅

縈青絆碧裂蒼苔，晚歲寒香宛轉來。
蛟舞凍雲冰骨瘦，龍眠夜月玉鱗開。
風霜氣勢從千折，鐵石心腸亦九迴。
祇為東君甘自屈，不教虛占百花魁。

紅梅

梨雲無夢倚黃昏
薄倩朱鉛蝕淚痕
宿酒破寒熏玉骨
仙丹偷暖返冰魂
茜裙影露羅衣捲
霞佩香封縞袂溫
回首孤山斜照外
尋春誤入杏花村



宋元詩會卷七十七

欽定四庫全書

集部
宋元詩會卷七十八

詳校官中書臣陸湘

主事銜臣徐以坤覆勘

總校官知縣臣繆琪

校對官中書臣田尹衡

膳錄監生臣金拱闇

欽定四庫全書

宋元詩會卷七十八

兵部主事陳焯編

周權

字衡之括蒼人延祐間遊京師以此山集受知於翰林袁桷桷序其詩曰意度簡遠議論雄深法蘊黃之準繩達騷選之旨趣蓋深與之

擬古 二首

東溟躍羲和西海沈望舒迭運不遑息汲汲司晨晡人

生百年間有如涉長途途長日苦短何以寧其軀白露
沾我衣衆芳忽萎枯逝將躡飛霞駐景凌方壺

山中有孤松託根在深澗磊落多節目偃蹇歲云晏豈
無干雲心亦有傲雪幹蕭颼起清奏可挹不可玩大雅
久寂寥古瑟絃已斷美哉遺音存佇立為三歎

讀淵明傳

淵明任疎散出處皆逍遙悠然解縣組不折五斗腰晴
川風日佳歸舟喜搖搖及門對妻子不覺衣囊枵居貧

道則腴念澹迹已超時復會田家興至不待邀種豆在
南山種苗在東皋投閒偶成趣心逸身匪勞孤懷託素
琴萬事付濁醪樂天以乘化內適何陶陶若人渺何許
世遠不可招千載東籬花寒香翳叢蒿采采不盈掬佇
立秋風高

紫鳳吟

楚客青綺裘售我紫鳳圖且言覩祥瑞與子縣座隅裴
回感客意因以致我詞不能鳴朝陽高翔碧梧枝惜哉

五章備乃向繚素施我圖已在揭顛倒隨天吳殷勤謝
客去玩目非所娛

古樂府

妾有嫁時鏡皎皎無纖滓照妾芳華年塗澤如花美郎
行向天涯歲月忽踰紀空閨生遠愁妾容為誰理妾容
匪金石寧復昔時比重拂故匣看炯炯光不巳人情重
顏色反目如覆水願郎待妾心明與鏡相似

原上楓

青青原上楓春至暢柔葉雨餘似膏沐幽蔽深澗合昨日原上行寒林淨如削此時澗中松偃蹇晚冰雪

牧童詞

我牧不憚遠牧多良苦辛所幸牧已狎馴擾無敗羣平原濕春煙碧草何披紛大牛隱重坡小牛飲芳津旦出露未晞及歸景常曛時復叩角歌歌俚全吾真取樂田野間世事非所聞

桃柳詞

灼灼絳桃花裊裊黃柳絲風流少年場妖冶不自持春
風日夜變點拂辭故枝飄紅惹飛絮流水同天涯美人
麗南國蘭蕙熏柔姿青春妬娉婷笑盼生光輝素絲感
清鏡朱粉難為施奈何桃柳質歲晏徒傷悲

懷別

青桑蔽繁陰玄鳥春將暮東風老松花長林翳黃霧俛
首事鉛簡流光暗中度淮水日夜流美人邈難晤賓鴻
盡北歸誰與達書素長歌復徘徊晴川渺煙樹

暮春

衆芳麗春輝天冶眩紅紫紛紛兒女情園香醉羅綺笙
簫夜鳴鳴申旦歡未已鷓鴣何處鳴繁華總流水誰知
搖落時可以觀物理

遊山寺

空林淨如掃石徑穿嶺細紺廬出深樹飛湍下雲際偶
逢赤髭侶囑我聽真諦菰肥齋鉢豐樾古佛燈翳遶檐
棘籬短野枳香入袂夕磬兩三聲半巖花雨霽

幽居

索居簡人事與世意空投柴荆已就理歲功念西疇落
落雞犬墟隱隱漁樵洲嘯傲一壺綠聊復寫我憂及辰
遇沖賞獨策還經丘向夕山景霽延矚明川流白雲息
空谷歸鳥鳴林幽人生亦委化汲汲將焉求

秋原

晴煙淡秋原枯梢翳殘葉蘭芷徒自妍芳馨誰採掇豈
無同心人歲月念飄忽咏思河水深迢迢暮雲合

謝僧茗餅

僧達無生機寂念若冰冷汲來石根泉淪以雲腴餅舌
端味枯禪了然發深省歸念石林空清颺下松頂

次韻張洞雲

張子湖海襟乃復喜崖壑朝餐進芝髓夜誦然松節深
雲暗幽洞仲夏欲飛雪下春煇餘景林水互明滅款客
垂磬室頗感十年別攜琴意已消酌茗石蘿月

楮澗月

道人澹無為，懶散忘盥櫛。
掃石秋樹根，楮澗濯殘月。
袖浥水光潤，屐帶山翠滑。
虛闌倚雲歌，清猿共孤絕。

湘中

天寒楚雲淨，木落湘山幽。
空江夜來雨，水滿蘆花洲。
西風何渺渺，滄波日悠悠。
有懷誰與言，注目孤鴻秋。

次韻幽居

晨興啟衡門，見此溪南山。
山光入溪淥，水底明青鬟。
熙熙自漁樵，清歌時往還。
莞爾發永悟，寘我丹青間。

相逢吟

客從郢中來抗志青雲表持螯共拍浮江遠孤舟小寒
夜潮氣白楚樹晴烏早酒闌起推篷落月在西島

明妃曲

逝水無回波去箭無反筈十載昭陽春萬里龍荒月風
沙滿宮衣慘淡餘香歇哀絃溼絲淚淚盡絲亦絕寄語
漢飛將此計誠太拙蛾眉豈長好不久為枯骨

贈雷紫崖高士曾築室於華山

紫崖高人頭欲雪神清貌古髯過膝
禿蛟入硯生雲煙叱咤風雷鬼神泣
清宵幽夢回瑤壇鼎中龍虎催九還
飄然晞髮太華頂醉睨海浪天風寒
竭來訪我蒼溪許白石清泉不堪煮
共譚世事雨茫然竹屋青燈夜深雨
牧羝行

朔風吹沙浩漫漫冷光射目愁雲昏
茫茫大漠亘萬里何處有路通中原
羝牧老草枯死倚節自誓無生還
餐羶啖雪氣自倍婉孌兒女懷饑寒
夜長空望漢月白

幾度弔影憐羈單已將傲兀壓憂患獨仗大義排堅頑
此生自信祇不乳豈意雁足傳間關歸來屬國豈不厚
區區一飯皆君恩

紀信歎

沛中龍奮砮礮雲咸陽楚炬三月焚兩雄角起鹿在野
三戶有楚無強秦貔貅百萬紛如雪戈矛盡染英雄血
旗旄曉蔽大河雲兵塵夜暗中原月滎陽數載戰不休
重圍食盡漢亦憂將軍詐帝出降楚脫帝虎口真良籌

無何諸將已平楚事定論功裂茅土獨無旌美到將軍
不得褒名紀盟府男兒死節志已酬瞑目地下夫何求
吁嗟功怨俱悠悠漢庭雍齒還封侯

子陵釣圖

東都熱官手可炙吳儂面似秋江色平生落拓一羊裘
七葉貂蟬不堪易功臣盡在雲臺中丹青化作灰塵空
先生遺貌乃在此釣竿尚裊桐江風悠悠世事江雲白
過眼輕帆自朝夕人間萬古仰孤風天上有星猶是客

清溪張埽雲不嗜酒肉工詩安貧所作少年行因

次其韻

五陵年少風流客花間開晏春壺碧豹胎熊掌羅玳筵
犀筋逡巡萬錢值綺羅吹香圍肉屏棖棖銀甲喧瑤箏
高燒紅蠟作長夜白日過眼如流星可憐氣岸如山阜
雨散雲飄不能久繁華富貴總成夢昨日朱顏今白首
爭如芝田野老衣縣鶉飲饌芝朮餐芳辛新詩日富不
厭貧少無佚樂老無戚尺澤自可潛幽鱗誰知清溪有

鶴不可馴白雲浩蕩青林春

焦山寺

赤霞夜出扶桑東海雲捲浪凌虛空剛風浩浩吹不去
崔嵬化作青蓮宮萬朶月寒清梵寂四面沈沈皆海色
鐘聲不許到人間自送潮音落寒碧

採蓮曲

越溪女郎十五六翠綰香雲雙鳳蹙嫣然一笑似花妍
艷試新妝照湖綠羅衣露浥紅芳秋少年陌上情綢繆

蘭橈容與隔花語驚散鴛鴦生晚愁蓮花莫折莖有刺
藕絲易斷針難度清歌一曲入湖煙空載香風滿船去

甓社湖

碧天如幕沈雲影飛燕不怒銀濤靜驪龍正睡貝宮寒
一鏡光凝青黛冷數聲玉笛來何處白鳥雙雙忽飛度
夜深明月生孤蓬人在廣寒卧風露

八里莊渡淮入黃河水渾不可飲過徐入清河水

方澄潔信筆閒記

河流汨汨如涇水濁浪崩騰疾馳一石中膠數斗泥
舟客居民皆飲此黃河不復行故道下注清淮通海溪
十人度索上一洪寸寸強弓挽難起屹然趺坐如僧禪
日與篙師同愠喜青山一髮認邳州蕭條暮上魚豚市
酒邊一笑我何為獨冒驚濤行萬里爭如林下混漁樵
俛仰嘯歌行復止回頭寄語北山雲征塵待向風泉洗

雞鳴臺

橫空陣氣長雲黑戈鋌照耀旌旗色龍跳虎躍鬼神愁

漢楚存亡一絲隔相持兩地皆雄據楚力疑非漢能拒
瑞起炎圖砒礪雲悲歌霸業烏江路空餘故壘傳遺跡
離合山河幾勍敵戰塵吹盡水東流落日沙場春草碧

謫僊樓

大羅僊子李太白秋水疎蓮浮玉色一來金馬玉堂中
詩酒猖狂天子客飄飄豪氣秋風起登樓曾醉東山市
放浪形骸宮錦袍榮華富貴東流水酒酣揮灑翻河筆
險語能令鬼神泣至今光焰照塵寰一字堪償雙白壁

我來懷古空悽愴風月千年尚無恙何時相見崑崙丘
汗漫從遊九天上

蒲萄酒

翠虬天矯飛不去
領下明珠脫寒露
纍纍千斛晝夜春
列甕滿浸秋泉紅
數宵醞月清光轉
穠腴芳髓蒸霞暖
酒成快瀉宮壺香
春風吹凍玻璃光
甘逾瑞露濃欺乳
麴生風味難通譜
縱教典却鸛鷖裘
不將一斗博涼州

長城

長城峩峩起洮水盤踞蜿蜒九千里朔雲浩浩天茫茫
悲笳落日腥風起猶傳鬼神風雨夕知是當時苦哥役
征人白骨掩寒沙化作年年春草碧祖龍為謀真過計
自成限域非天意力窮城杵怨聲沈禍起蕭牆險難恃
豈知一朝貔虎來關東咸陽宮殿三月紅

冷泉亭

昔人來自天竺國縹緲孤雲伴飛錫天風吹落凝不去
化作奇峰聳空碧至今裂峽餘雲髓桂冷松香流未已

翠光圍住玉壺秋不放晴雷度山趾道人晏坐無生滅
炯炯層胸照冰雪夜深出定汲清泠寒猿啼斷西岳月
曙巖上人

巖扉人不到竹色滿僧闌林雨添經潤窓雲入硯寒夜
龕猫占卧晨鉢鶴分餐客至無餘事敲冰煮月團

野趣

地偏居自穩石路接平田雲合茅檐樹雨添花澗泉空
山晴滴翠遠水綠生煙喚酒青林渡斜陽繫客船

贈別

南雁飛應盡攜書始問程
別離情易惡貧賤意難明
樹色春城暗鐘聲曉寺清
孤燈山驛酒後夜共誰傾

倦遊

萬事雙蓬鬢江山賦倦遊
斷猿明月曙疎雨碧梧秋
道路中年感琵琶後夜愁
客懷無處寫離思滿滄洲

郭外

郭外人家少漁村颺酒旗
江雲低壓樹沙竹細穿籬
地

暖梅花早天寒潮信遲夕陽煙景外倚杖立移時

社日

端居忘節序物化靜中觀遠岫春雲澹深村社雨寒溪
花紅暎屋堦樹綠平闌喧醉田間叟雞豚日暮歡

客中送張歸雲

相逢俱是客對酒感流年落日沙頭雁清風樹杪蟬山
鐘隔林寺江火趁潮船何日茆檐下清燈話雪川

次韻村居秋日

瓜芋芄芄綠滿疇村居容易樂深幽白雲僧屋開孤嶂
疎竹人家帶淺流半榻清燈初耿夜一聲長笛欲橫秋
何時歸把滄洲釣已軟閒盟向白鷗

村行

風落漁歌隔浦聞前村獨樹正斜曛誰家桃李迷荒棘
半隴牛羊卧古墳橋斷春堤多積雨溪深野碓自春雲
青旗搖曳疎林處剩把閒題與客分

張氏新居

小雨東風拂袖寒
神仙華屋畫圖間
茶香入座午煙歇
花影壓簾春晝閒
翠竹白沙泉細細
朱闌綠樹鳥關關
客來一笑推棋局
坐占溪南十里山

秋日

石脈泉花蘸眼明
竹根沙路舊經行
雲歸天際山容澹
日落江頭雁影橫
梧葉庭除秋漸老
豆花籬落晚初晴
客行迢遞歸心遠
煙火蒼茫起暮程

次韻閒居

鍾鼎山林有命存遊心物外已忘言希夷太華煙霞室
處士孤山水月村齷齪可憐雞舞甕昂昂未羨鶴乘軒
不須對客談餘事笑領琴歌竹下樽

秋望

暮鴉歸處斷霞明搔首風前萬里情烟抹山光翠屏冷
水涵天影玉壺清蟲鳴沙逕宵初永雁落蘆汀月未生
何事數聲江上笛吹將離恨滿孤城

訪陳子高德星堂

短策輕衫借晚涼，偶來談笑德星堂。
竹深四壁生虛籟，山近半村無夕陽。
池折泉聲歸座壑，松蒸雲氣溼衣香。
蕭然門巷無輪鞅，隱几觀書味更長。

次韻孟韶卿

知道龐公不出山，因為訪鶴借山看。
海棠開盡雨方歇，燕子來遲春尚寒。
一塢煙霞隨步履，千峰紫翠入憑欄。
掉頭巢父成何事，謾向珊瑚拂釣竿。

送友東歸

東華厭逐輓紅塵一見潘郎興味真
落落孤松林壑志
昂昂野鶴水雲身
關山客夢三更月
驛路梅花十里春
誰唱渭城朝雨曲
座中愁絕未歸人

山齋

娟娟萬竹照清溪
約住閒雲作伴栖
隣曲樵人曾結社
樽前詩客偶分題
東風一樹棠梨老
落日千山謝豹啼
閒向靜中參物化
人間岐路任東西

毗陵

數家煙火自成隣，寂寞荒祠野水濱。
壞屋有基餘瓦礫，古墳無主自荆榛。
暄風綠樹鶯聲老，曉雨青郊虎跡新。
四月三山山下路，野田猶殿菜花春。

次韻令尹解官歸九江

滿眼山河落木秋，遠遊時復賦登樓。
解官彭澤如元亮，呼酒新豐似馬周。
歲月駸尋人易老，乾坤浩蕩水空流。
輸公已了公家事，臥對廬山雪滿頭。

懶菴講主得九江餅茶鄧同知分餉其半汲泉試

之

解組歸來萬事輕
日長門巷澹無營
團香小餅分僧供
折足茶鐺對客烹
色捲空雲春雪湧
影沈江月夜潮生
一甌洗却紅塵夢
坐愛風前晚笛橫

信題

已識浮雲似世情
歲寒老硯是心朋
平生不貸監河粟
自擷香芹煮澗冰

晚渡

離離野樹綠生煙灼灼山花爛欲然沽酒人歸春渡寂
柳根閒繫夕陽船

許有壬

字可用湯陰人幼穎悟讀書一目五行年二十暢
師文薦入翰林不報延祐二年登進士第授同知
遼川事為政輒有聲除山北廉訪經歷遷吏部主
事轉江南行臺御史劾貪除暴部內肅然拜監察
御史英宗崩賊臣特克實將作亂有壬首疏其罪及
特克實伏誅泰定帝自上都至復上章言特們德爾
之子索諾木與聞大逆乞正典刑於蒙難諸臣俱請
雪寃復職元年立詹事院選有壬為中議改中書
左司員外郎陞右司郎中天歷三年擢兩淮鹽司
至順二年召參議中書省事元統甲戌拜治書侍

御史轉奎章閣侍書學士歷中書參知政事會平章徹爾特穆爾挾私憾奏罷科目有士力爭之不得遂稱疾在告帝強起之至正改元轉中書左丞明年以浮言移疾歸屢召不赴六年誣白召為翰林學士承旨御史中丞復辭歸十三年起拜河南行省左丞遷集賢大學士中書左丞階至光祿大夫卒年七十八所著有至正集諡文忠

神山避暑晚行田間用陶詩為韻

三首

田塍晚獨策及此時雨晴東畦與西疇泱泱流水聲豐年已足歡清風復多情歸來藉草坐濁酒還自傾寧用澆醜磊我懷無不平

寢迹非絕世雅志便林丘青山足一至勝處靡不遊意
適輒忘返茲焉夏已秋遙遙目力窮青青盡田疇迷復
幸不遠歸與無異謀

昔人植松柏映蔚彌崇岡不為朝夕利千載當自長植
槿非不榮我圃因之荒白髮走畏途途脩馬非良桑榆
賴非晚此樂且無央

宿臨湘贈誠之監縣

北風櫓聲乾晚泊斷磯下雲岫浮脩蛾霜空入平野鳴

雁無處尋落日不可畫重岡護巖邑百里寄民社藉甚
賢大夫居然魯恭化豐年足粳稻沃壤盈桑柘我如無
心雲底事勞候迓爛醉得詩歸江山非傳舍

題友人所藏明妃圖

臂香骨沁守宮虐金鎖重門怨銀鑰深宮有眼不識春
晝長時聽雲間樂平生所見惟監宮今朝豈期見畫工
君王知畫不知妾薄命已分如秋蓬黃沙漫漫天無極
驚飈吹老紅芙蓉宮廬明日又何處此生遂負南歸鴻

和親納侮號上策建議始謀婁敬責妾身雖苦免主憂
猶勝專寵亾人國關山寥落夢亦迷嫁雞正爾隨雞飛
人間生女莫望貴只可近作田家妻琵琶聲斷霜天月
青塚至今青不歇後來却有蔡文姬千古邊笳動哀拍
喜逢口

灤陽驛東北四十里有雙塚世傳昔有久戍不歸者
其父求之適相遇此山下相抱大笑喜極而死遂葬
于是俗因謂之喜逢口亦猶望夫之有石也雖莫究

其世代姓氏而其言有足感人者故作是以紀之

兒寒解衣重撫摩兒饑推食孰忍訶長城與國負遠戈
一去不返當如何去時云戍東北鄙直出榆關度遼水
白頭老翁形影俱豈憚山川千萬里天教此地適相逢
父曰從天墮吾子笑疲樂極俱殞身誰謂情鍾遽如此
官家開邊方未已同生又別寧同死山雲漠漠風颼颼
山頭雙塚知幾秋當時不忍一朝喜今日翻飛千載愁
猶勝貞女化為石終古孤身雙不得清江寒影日悠悠

行人一去無消息

田家對雪

野老能留客柴門便反關
落梅點衣上飛雪墜杯間
地僻偏宜竹窓幽更對山
自憐真野逸瓶罄不知還

夜至魯港

桴鼓遠銅龍前驅列炬紅
星芒寒拂地江影靜浮空
聽語漁村近連航水驛通
不才慚傳食鮭菜足為供

荻港早行

水國宜秋晚，羈愁感歲華。
清霜醉楓葉，淡月隱蘆花。
漲落高低路，川平遠近沙。
炊煙村不斷，山崦有人家。

神山雨

山中日日雨松竹，早知秋清響自深夜。
逸人無遠愁意，虛聞葉落林暗見螢流。
對景因懷杜江村事，事幽

登後山觀湖漲時陰雨忽霽

世去重華遠，名偕二石存。
溪寒清見底，榕老亂垂根。
野色偏宜晚，民居僅似村。
曲江人已矣，楚些擬招魂。

橫浦登舟

南征殊不惡樂事總相關
馬上行思句舟中卧看山
盡收煙景去滿載月明還
何往不自得浩歌天地間

白菜

土羔新且嫩筐筥薦紛披
可作青精飯仍攜玉版師
清風牙頰響真味士夫知
南俗稱秋末投簪要及時

地椒

凍雨催花紫輕風散野香
刺沙尖葉細敷地亂條長
楚

客收成裏奚童擷滿筐行厨供草具調鼎爾非良

尋梅

何以慰吾衰梅花秀發時晚香傳遠樹春雪避南枝林
靜來差早溪深行獨遲與君謀一醉及此未披離

九日陪闔臺諸公登石頭城

一江環抱四山圍酬節追歡剩費詩雁影不移雲盡處
秋光都在雨晴時當年玉樹人空歎明日黃花蝶豈知
便駐高軒拚醉倒絕勝無酒繞東籬

神山即事

京塵汨沒已華顛恰是山居第一年
松月照窓詩入聖竹風吹榻夢遊僊
隨人久作悠悠者處世方知綽綽然
尚愧未能忘口腹時勞昆季致肥鮮

和謝敬德學士見寄

平生疎懶是天姿今歲春來起亦遲
好酒或如陶靖節杜門深愧鄭當時
向來事業惟供笑如此韶光忍廢詩
館閣真才試枚舉鵲山陪預恐難期

登岳陽樓

半空輪奐壯巴丘
消得騷人一繫舟
雲氣遠攜湘雨至
湖光寒入蜀江流
山川信美非吾土
天地無窮有此樓
三十四年如夢過
可憐華髮賦重遊

過湘潭

江邊楊柳翠縈迴
柳外人家罨畫開
一夜東風花落盡
千年華表鶴歸來
暮雲山出遠浮黛
春雨水添濃潑醅
莫艤扁舟訪陳迹
白頭懷抱易生哀

閒居雜詩 二首

半山雲樹接脩篁鎮日無塵到草堂
氣牖風來書葉亂
膽瓶花落硯池香
壺觴自酌教微醉
松菊猶存及未荒
護果灌園常不暇
誰知閒裏更多忙

鵲山東北接郊墟郭影嵐光畫不如
九十日春朝暮雨
兩三間屋古今書
庭花紅礙經行處
園樹青回剪伐餘
滿地蒼苔愁踏破
年來深喜故人疎

和傅汝礪寄來韻

江水舟航日夜東故人音問得常通君才能挽千鈞力
我老惟懷一畝宮自古山林容小隱只今臺省有諸公
欲知別後詩成處都在花香竹影中

和康里子山韻

洞深春早透蘭芽
窻曉雲香亂海霞
萬丈紅塵飛不到
紫簫吹綻碧桃花

行縣書所見

春雨初晴漲稻畦
石渠分水灌麻池
醉翁社散忘歸路

行過柴門尚不知

次黎東山鳳栖別墅韻

風漪舞翠躬耕稻雲錦紅酣手種花策杖尋君迷不得
有書聲處是君家

蘓彥良西塾堂

蒼苔滿徑樹連村中有幽人屐齒痕此去客來宜定約
無詩無酒不開門

李洞

字漑之滕州人生有異質姚燧見其少作深歎賞
之薦於朝授翰林國史院編修官及考除集賢院
都事轉太常博士監修國史長史歷秘書監著作禮
儀院經歷擢奎章閣學士超遷翰林直學士洞以
奏對稱旨見知文宗因著輔治篇以進帝嘉納之
朝廷大議必使與聞詔同修經世大典書成謁告
以歸遣使召之疾不能起卒
年五十九有文集四十卷

題漢陽郎官湖

山翁薄暮醉酒歸杖藜迷却高陽池清風吹花綠陰倒
我笑謂是秋雲移還乘貫月槎夜過郎官湖崢嶸星斗
入江漢蕩漾槎影如鯨魚九華之真人邀我倒玉壺麒

麟擘脯供行厨依稀仙樂在空際碧山四暎寒蟾孤舉
酒酌寒蟾明月下飲姮娥俱霓裳拂雲錦萬荷露瀉瓊
瑤枝麾幢掩靄羅煙空乃有玉皇所授之玉童風前飄
飄曳廣帶對立十二秋芙蓉清香九曲銀河通真人綠
髮披春風錦袍玉雪照天地口說姓字安南公是公多
逸氣略與古昔賢豪同時能掃月色延我石室煙蘿中
又言昔同張謂所遊地長笑一覆丹霞鍾風吹仙樂度
溪去我已醉卧香爐峰

我本山人素志丘壑獲歸名山為願畢矣爰以四月十一日離京師是夜抵潞陽慨然賦詩遙慰匡廬隱者併似金門諸公為一噓云

野馬脫羈鞅倏疑天地寬臨風一長鳴風吹散入青冥間頗如魯仲連蹈海不復還又如安期生長留一鳥令人看江南浩蕩忽如海落日照耀浮雲關既不能低眉伏氣摧心顏詭遇特達驚冥頑又不能抱書挾策千萬乘調笑日月相迴盤匡廬迢迢接仙山仙翁汎若秋雲

間長松之陰引孤鶴望我不見空長歎采鉛天池津飲
綠桃花灣蒼梧倒影三湘寒赤城霞氣生微瀾鯨鯢翻
空海波赤曉色欲上扶桑難人間之樂不足恃何如歸
卧棲岳巒棲岳巒兮卧雲穴夜半天風吹酒醒猶有西
樓萬年月

月夜過采石呈樵隱學士兄

空江偃仰見明月月向天心散冰雪捫天恍惚與之語
桂樹瓊枝紛糾結倏疑枯槎泛河漢又似山陰理歸楫

美人不來江水深，獨對風鐘正愁絕。
欲愁絕兮奈此懷，征帆茫茫江上開。
黃蘆風起鳥聲至，千里一望銀山來。
銀山嵯峨隔滄海，海上羣僊復誰在。
巨鼇已謝三山沈，扶桑蕭條失光彩。
丹砂不逐兒童歸，曠懷更為秦人悲。
英雄立國，彼其志，想儀金罍，空歲蕤。
笑呼白雲觴我酒，疊翠連山作窓牖。
夜風吹月落西去，水氣冥冥澹星斗。
夜深忽見峨眉亭，紫鱗欲去江潮生。
只愁新詩幻出金碧龍，虎文翩然收我日月元氣歸滄溟。

寄吳源可

不謂相疎亦自猜
空山舊雨入莓苔
江湖機熟鷗忘去
吳楚年荒雁不來
豪傑何心猶用世
乾坤自古少憐才
向來共醉梅花下
昨夜一枝寒自開

龍從雲

字子高詩
名魚軒集

明皇秋宮夜晏圖

金莖滴露秋滿衣
玉樓商葉吟參差
六宮沈沈度清樂

月在華清池上芙蓉枝虹橋錦步上龍尾十八宮娥舞
相對玉環吹笛背銀燈百歡媚得君王醉君王醉卧倚
龍屏羯鼓噉嘈尚未停祿山含笑林甫喜但願君王醉
不醒

雪花曲

苦篁漠漠吹北風黃河水流凝不通天孫手持白鸞尾
盡埽琪花舞碧空崑山欲削瓊樓裂老龍起舞驚明月
應是遊魂不覺寒醉吟紙帳春雲熱東家嬌娘厭桃李

學繡宮花瑣窓裏冷把擎來欲細觀隔簾火氣催成水

鶴骨笛

九臯聲斷楚天秋玉頂丹砂一夕休枯朽挽回生死調
淒清吹盡古今愁魂歸遼海身如寄曲破江城月滿樓
惆悵主人三弄罷杳無消息到揚州

美人紗帶

滿眼春嬌倚繡牀玉鈎新綰藕絲長鴛鴦機上舒晴雪
翡翠簾前蹴曉霜拾翠不知羅襪潤踏花猶隔繡鞋香

幾回暗憶吹簫侶背立東風咏鳳凰

僊壇

碧壇燾影陰龍蛇騎鶴歸來棗似瓜僊語風前飄玉屑
道衣天上散雲霞寒潭六月猶無暑老木千年尚有花
采藥青童來借問蒼煙起處是誰家

王廓

中州人字廓然官長沙不得
志投劾徑歸有寥天集行世

小孤山

江上青山一劍孤氣虹夜貫斗牛墟寒藤古祠神所居
謾說彭郎迎小姑俚言不經聽者愚舉世孰與明其誣
山下長江通蜀吳飛廉怒鎖千舳艫乾坤變色慘不舒
竿摧纜絕愁萬夫初疑破塚遇老狐又訝伏波留賈湖
陽侯負弩雄前驅馮夷擊鼓嚴後車六鼇掣釣軒蓬壺
八駿鞍轡鞭龍魚神靈怪駭千萬殊縱有健筆難窮書
一官長沙賦歸歟三年卧病南陽廬故交新貴一字無
扁舟夢鱸松江鱸行或止之不可虞呼童取酒聊自娛

短歌激烈驚樵漁掀鬚一笑誰和予隣商去住依祝巫
盤餐拜祠牆上烏百錢之利衆所趨浪走不待晨雞呼
進銳退速中乘除未要冒險爭前途江山正自不我疎
我亦樂與江山俱安得匹素百尺餘他年寫我東遊圖

黃陵曲

黃陵磯頭煙樹簇黃陵廟前煙草綠來朝時接洞庭君
驚浪掀空駕銀屋雨風吹散魚龍腥天空落日波冥冥
君王龍馭夜臺冷雲晚蒼梧山更青月華二十五絃秋

聲斷白蘋江自流竹花遍淒野林血地老天荒蛾黛愁
嬪虞雙筭虞已老雲鏡芙蓉怨秋槁天子巡遊后不從
祇益神明楚詞好千帆萬櫓香火足古木蒼藤鴉鷺宿
夜寒星斗滿晴川漁郎時唱湘靈曲

孫轍

字履常臨川人幼孤母蔡親教之即警策自勵長
而學行純篤以孝聞家居教授四方問業者戶屨
恒滿監司屢辟皆不
就吳澄盛稱其文

擬古次楊志行韻三首

涉江采芙蓉江水何澄鮮朱華映朝旭窈窕重風前相
望不盈咫風波良獨艱攬之置懷袖撫玩空長歎春榮
衆所慕泯默無復言

孟冬寒氣至盼彼庭中樹忽得故人書中有相思句故
人隔異縣相望良獨苦候蟲鳴廣除落葉被衢路淒其
對搖落登高詎能賦白髮生鏡中荏苒流年度故人歲
寒姿亦有濟勝具相期佩飛霞共飲金莖露

青青河畔草春至不復腓延緣被坡陀飽彼牛羊饑荏

萬時序遷王孫終未歸西風一蕭瑟楚客空傷悲安知
壯士心金石乃不移陰陽無停運垂柳生金絲鳥鳴百
花開迴首乃爾為丈夫貴自勗千載以為期

宋元詩會卷七十八